

LAVDATIO FVNEBRIS  
D. PHILIPPI III.  
HISPANIARVM  
ET INDIARVM  
REGIS,



Dicta in Exequiis eiusdem, solemniter celebratis in Ecclesia Cathedrali Antuerpiensi,  
die XXII. mensis Maij, M. DC. XXI.

A LAVRENTIO BEYERLINCK  
eiusdem Ecclesiæ Canonico & Archipresbytero.



ANTVERPIÆ,  
EX OFFICINA PLANTINIANA,  
M. DC. XXI.



MAGNÆ VRBIS ANTVERPIENSIS  
MAGNI CONSVLES,  
MAGNI SENATORES,  
P H I L I P P O I I I.  
REGI CATHOLICO,  
HISPANIARVM ET INDIARVM  
MONARCHÆ MAXIMO,  
CVLTV REGIO,  
RITV CATHOLICO,  
ADFFECTV MAGNO  
HIS DIEBVS PARENTASTIS.  
SOLEMNIIS VESTRIS LACRYMAS,  
ET LAVDES VOCE INSPARSI:  
VTRASQVE BENIGNE EXCEPISTIS.  
EAS NVNC TYPIS CONCEPTAS  
BENIGNE ETIAM ACCIPITE,  
ET ILLVM QVI DEFERT  
ÆQVIS OCVLIS ADSPICITE.

## A P P R O B A T I O.

**L** A V D A T I O *hac in Exequiis D. PHILIP-  
PI III. Hispaniarum Indiarumque Regis  
maximi, dicta à Reuer. Domino Laurentio  
Beyerlinck, Canonico & Archipresbytero Ec-  
clesiæ Cathedralis Antuerpiensis, quod lauda-  
tissimi Regis memoriam ad posteros transmittat,  
& veri Principis imaginem proponat, typis &  
luce dignam censui, Antwerp. die VIII. Junij, an-  
ni M. DC. XXI.*

Zegerus van Hontzum, eiusdem  
Ecclesiæ Cathedralis Antwerp.  
Canonicus & Pœnitentiarius,  
librorumque Censor.

LAUDATIO FVNEBRIS  
D. PHILIPPI III.  
HISPANIARVM  
ET INDIARVM  
REGIS.



**P**HILIPPI III. Hispaniarum  
Indiarumque potentissi-  
mi Monarchæ, Religionis  
Christianæ indefessi propu-  
gnatoris, & humani gene-  
ris desideratissimi Parentis,  
nuper mortalitate exuti funus pompa ferali  
instauremus; & quod debemus, VIRI REVE-  
RENDI, SENATORES AMPLISSIMI, im-  
mortalem eius memoriam, pio, sed repentino  
laudationis officio prosequimur. O ludibria  
infelicitis vitæ! ô vitrea mortalium vota! ô fu-  
gacem hominum spem! Ecce: quo Principe  
ad integrum restitui Christiana Res, & Pietas

A 3 po-

potuisset; in quem intuentes Belgæ, omnium  
 quæ nos aliquando exceperunt calamitatum  
 vulnera obligabamus; quem Sereniss. Principi  
 nostro ALBERTO, ô verè Principi! ô verè  
 Patri! si fortè tributum suum ab eo Natura,  
 vt hominum res tenui filo pendent, exegis-  
 set, successorem Principem, datâ acceptâque  
 An 1616. fide inaugurauius pridem; improuisò subla-  
 tum, & inexpectatum funestę laudationis ar-  
 gumentũ cernimus. Igitur lacrymas & laudes  
 dabimus: sed à vobis, NOBILES AC REVE-  
 RENDI DOMINI, qui funebrem hanc Ma-  
 ximi Regis pompam magno pietatis obsequio;  
 à vobis, SENATORES, qui eandem cultu  
 regio, adfectu maximo adornatis, excipiendas.  
 Et quidem illas excutiet iustus mœror, qui eò  
 acerbior huic vrbi, quò ea nulli alteri obser-  
 uantiâ erga optimum Regem se concedere  
 profitetur. Has verò encomium defuncti, &  
 digna Principe virtus vbertim eliciet. Quam-  
 uis Regem illum non hæc brevis & subita  
 prædicatio, sed æternus Annalium honos ce-  
 lebrem esse faciet, nomenque eius numquam  
 interituris trophæis accumulatum, ad seros  
 nepo-

nepotes transmittet. Quod enim præstabilius aut pulchrius Deorum munus, inquit Plinius, quàm castus, & sanctus, & Dis simillimus Princeps? Talis profectò erat Rex PHILIPPVS; vt si, quod de Traiano Imperatore iterùm Plinius, adhuc dubium fuisset, fortè casuque rectores terris, an aliquo Numine darentur, Regem tamen illum constaret diuinitus constitutum fuisse. Eheu PHILIPPE! quantam doloris materiam improuisâ tuâ morte adtulisti! Quantam laudationis segetem mœrentibus nobis, & non nisi singultatim verba hæc feralia depromentibus suggestisti! Et sanè, si laudandus eras, si lugendus, in celeberrimo hoc virorum vtriusque Ordinis Theatro lugendus eras, in augustissima hac, & cælorum Augustæ sacratâ Aede laudandus. Siquidem illi te viuentem adhuc & mortalitatis zonâ præcinctum, ceu Numen quoddam terris præstitum, & velut communem Patriæ Parentem, ac Religionis Catholicæ acerrimum vindicem venerati. Hæc autem celeberrima, ad quam conuenimus moles; vestigiis maiorum tuorum nobilitata, etiam-

iamnum CAROLI istius aui tui mnemosy-  
 non in imo Chori fundamento obseruat : &  
 PHILIPPI Patris memoria , nobilioribus  
 Comitiorum PHRYXEI VELLERIS hîc  
 An. 1555. celebratorum insigniis , ac perenni quam in-  
 tuemur inscriptione superstitat. Fecisset uti-  
 nam ille qui linguas infantium disertas esse  
 facit Deus , vt tam eximij Principis laudator  
 idoneus existerem ! Cùm nulla sit etiam ma-  
 ximè torrens dicendi copia , quæ illius enco-  
 mium narrando exequi valeat. Ideoque reue-  
 rentius mihi visum , integra illibataque non-  
 nulla mentibus vestris referuare , quàm car-  
 ptim vniuersa perstringere . Ergo stirps ip-  
 sa , & generis magnitudo , quæ Principatui  
 huic initia fecêre , initium etiam dicendi fa-  
 cient. De quibus tamen non aliud dicturus  
 sum , nisi quod sciant omnes , AVSTRIA-  
 CÆ DOMVS primordia , potentiam , trium-  
 phos. cuius inclyta gens annos iam plus tre-  
 centos in hoc æuum floret , & in omne , Deus  
 vota secundet ! florebit. Cuius præsidio Chri-  
 stianæ Res firmanantur : cuius religione Christi  
 Ecclesia aduersus inferorum portas, Barbaro-  
 rum



rum inquam indomitam licentiam, & nouitiam perditorum aliquot ad Dei legem cupiditatum suarum portenta detorquentium colluuiem, communitur, ne vmquam praualeant. Atque vt commendationi alienæ adhuc aliquantum demus, à Parentibus etiam non minimum decus crepto Regi accedit. quamuis ipsius virtus tanta sit, vt non solis maiorum meritis titulisque nitatur. Quis enim ita rerum imperitus, qui nesciat CAROLVM illum appellatione nominis QVINTVM, at laude & opinione virtutis primum, de Gallo, Turcâ, Afris, Italis, Germanis triumphantem, ac diuissas toto orbe Indiarum Prouincias Regnorum suorum cumulo adiicientem, hunc in filio suo PHILIPPO II. heredem & Imperij successorem olim dedisse? Iam verò PHILIPPI istius, quem PHILIPPVS III. patrem habuit, elogia & imagines quis exequatur? nisi quòd extensa ipsius gloria

— *quæ brachia longè*

*Margine terrarum porrexerat Amphitrite,*  
victoriis quoque & vitâ exstiterit illustis; vel  
hoc solum victurus, quòd Lusitaniam, opu-

B len-

IO LAVDATIO FVNEBRIS

lentissimum potentissimumque Regnum,  
septuaginta dierum spatio sibi posterisque  
subiecerit, & quæ supra annos quingentos re-  
liquâ Hispaniâ fuerat auulsa, restituerit: AN-  
TONIVM qui se Regem ferebat, & in quem  
plebs vicissim ferebatur, postquam in Regno  
Castellæ latitantem se gnaro ne repulisset qui-  
dem, vno prælio fuderit fugaueritque. Vt ni-  
hil adducam de Pietatis & Constantiæ laude,  
quâ Principes olim laudabilis æui æquauit; fa-  
ctoque sibi vindicauit, NEC SPE, NEC ME-  
TV. Viuet igitur ille, viuet

*Dum domus Aenea Capitoli immobile saxum  
Accolet, Imperiumq; Pater Romanus habebit.*

Ab his progenitoribus (vt sileam ANNAM,  
nulli secundam moribus & sapientiâ Heroï-  
nam, quæ mater illi fuit) Pietatem erga Deum,  
Deique & sacrorum ministros, ac domicilia,  
& generosæ indolis nobilitatem, morum a-  
ctionumque grauitatem, velut cum ipso lacte  
hausit Rex PHILIPPVS, & in omni reliquâ  
vitâ retinuit.

Natus est autem Madriti, vrbe Regiâ, an-  
no reparatæ salutis octauo supra millesimum  
& se-

& septuagesimum, mense Aprili: mense in-<sup>An. 1578.</sup>  
quam, ob insignes triumphos, festa, inaugura-  
tiones, apud veteres illos Quirites memorabi-  
li: die verò XIV. Ægyptij Pharaonis demersio-  
ne, & Hebræorum redemptione celeberrimo.  
Idque eâ oris venustate, vt vel in ipso vitæ ac-  
cessu omnes ingenitam indolis Regiæ imagi-  
nem iam in pusione perspicerent; quamque  
reliquo ætatis decursu præ se tulit maiestatem,  
vultu expressam faterentur. Quod tacitè cum  
animo suo expendens prudentissimus Re-  
gum PHILIPPVS II. reliquis vitâ defunctis,  
hunc sibi superstitem, in Principem Hispania-  
rum, tantorum Regnorum futurum aliquan-  
do heredem, vix sextum à natiuitate annum<sup>An. 1584.</sup>  
egressum, summo omnium plausu instituit,  
dignumque habuit, quod Aureliano Augu-  
sto Panegyristes ille adscribit, qui Rempubli-  
cam patris suffragio susciperet. Cui solennita-  
ti non parum splendoris addidere Iaponiæ Re-  
gum Legati, quos illi ab altero orbe ad Grego-  
rium XIII. Pontificem, Christi in eo Vica-  
rium professuri, & Catholicæ Fidei formulam  
suscepturi, magnis itineribus miserant.

Inter hos Imperij fasces educatus Rex PHILIPPVS, & in illâ potentia officinâ enutritus, modestiam cum dignitate sapientia, comitatem cum grauitate gerebat. Cumque non ignoraret magnitudinis semina coalescere nutrimento disciplinæ, præclarissimis se tyrociniis exercuit, auitæ paternæque virtutis æmulus. Versabatur iam tum in oculis eius Principatus finis, qui est populi bonum, non altitudo, aut splendor. *Imperare officium est, non regnum*, ait Seneca; & Græci ἀνακτας Reges dicere, vt Plutarchus exponit, ἀπὸ τοῦ ἀνακτῶς ἔχειν. quod est curam gerere, & tueri. Apud Latinos nomen Regis, compositum regimen & directionem populi suadet; eoq; te vocat, si illud defers. Lubricitatem verò adolescentiæ, quæ ceræ instar in vitium flectitur, inter palatij strepitus sanctissimis legum institutis coercerebat; vt à teneris illi fixum insisteret, à recto rationis tramite ne latum vnguem discedere. In sensu pariter & in cultu eâ erat modestiâ, vt nisi Regem nouisses, priuatam personam induisse æstimares. Hominem se cogitabat, & in altâ illâ fortunâ casum adesse qui deprimat, & con-

constringat: mortem non tardare; quæ lignibus sceptrâ, pauperum tabernis Regum turre æquet. *Magis regium*, dixit ad Alexandrum Aristoteles, *animum præferre excultum & compositum, quàm vestem corporis*. quomodo etiam Alexander Seuerus verè pronuntiavit, & seriò, *in virtute Principatum esse, non in decore*. Certè cultus aliquis è cælo in Principem, qui Dei in terris Vicarius & imago est, venit, sic vt commentitio & fucato non sit opus. Sed & Castitas aliis affectata, PHILIPPO fuit congenita. Quippe in liberiore illo Magnatum ludo, oculos mentemque continebat, ne vel minimam inconcessæ libidinis maculam integritati suæ inureret atque in illo ætatis æstu ita se adstrinxit, vt non immeritò Alexandri Macedonis de hac ipsâ virtute erga deuicti Regis coniugem, cuiusque præcellenti formâ filias, memorabili continentia testatâ, gloriam attigisse pro comperto sit. Et quia non ignorabat vitam Principis censuram esse in quam omnium oculi conuerterentur, haud secus quàm ad solis motum herbæ quædam; custodem sibi ipse semet ponebat, qui dicta

Panorm.  
lib. 4. de  
Gestis  
Alphonfi.

factaque iustitiæ lance trutinaret. Voluebat mente, quod olim Alphonso Arragonum Regi familiare affirmant Historiæ, *Tantò priuatius hominibus Reges meliores esse oportere, quantò honoribus & dignitate antecellerent*. Monet Theodosium Claudianus:

*Non tibi quid liceat, sed quid fecisse decebit  
Occurrat, mentemq; domet respectus honesti.*

Aureum monitū, & à Principe vsurpandum!

Ceterum ambiguo vitæ itineri ductorem, cui venientes annos supponebat, adhibuerat, eoque velut animæ pædagogo, & adfectuum emendatore vsus fuit annis pænè xvi. eximium è sacro Prædicatorum Ordine Theologum, *Ludovicum D' Alyaga*, qui & doctrinæ merito, prauitatis hæreticæ primus Inquisitor per Hispaniam renuntiatus, & sapientiæ prærogatiuâ, ad rerum status Consilium adscitus olim fuerat. Hic deuotissimi Regis animum tam religiosâ moderatione excoluit, & virtutum omnium, quæque harum est basis, pietatis condimento temperauit, vt auditam ferant ab eo nobilem hanc vocem, quam disertissimo suo & Palatij sui Ecclesiastæ *Hieronymo à Floren-*

*Florentiâ , è Societate IESV Presbytero & Theologo, edixit: Mirari se, reperiri homines adeò salutis immemores, qui mentem letali culpâ inquinatam prius vespere componant ad quietem, qua suprema fortassis illis futura, quàm per pœnitentiam expunxerint; seq̃ tam temerè duraturis aternum cruciatibus exponant. Ex quo conficiamus necesse est, quantum ab omni mentis inquinamento exstiterit alienus, qui illius noxam vel in aliis detestabatur. vnde & ab iis quæ specie minuta videbantur sedulò sibi declinandum ratus, nullum peccatorum suorum conscium magis timebat, quàm semetipsum. Alium potes effugere, scribit Seneca, te autem numquam. & alias: O miserum te, si contemnis hunc testem!*

Intereà PHILIPPVS II. iam annis & me- An. 1598.  
 ritis grauis, (LXX. namque & duos numerabat) ex hac statione euocatur, immarcescibilem gloriæ coronam aditurus. Verùm is edoctus quàm benè humeris PHILIPPI filij sui federet Imperium, vt cuius consilia in rebus arduis fuerat expertus; paulò antè amplissima tot Regnorù gubernacula ei concesserat. quæ  
 quidem

quidem ille eâ prudentiæ moderatione inflexit; vt, quod de Magno Theodosio Ambrosius, in illo velut rediuuium è Patris cinere Patrem omnes agnoscerent, & amplecterentur. Quippe in primo illo, & quo sub cælo maior non est, dignitatis & maiestatis fastigio, eâ cum laude semper versatus est, vt nihil modestæ hilaritati seueritas, nihil sinceritati grauitas, nihil Regiæ maiestati comis humanitas detraheret: neque, quod rarum in viro Principe, adeoque imitandum, vllò vitiorum (quæ nonnumquam inter laqueata tecta Tyriæque vestis colorem delitescunt) confinio, faustis enutrita sub penetralibus indoles læderetur. Equidem vt verè & scitè iterùm Claudianus,

— *Numquam sincera bonorum  
Sors vlli cōcessa Duci. Quem vultus honestat,  
Dedecorant mores. Animus quem pulchrior  
ornat,  
Corpus desistit. Bellis insignior ille,  
Sed pacem fœdat vitij. —*

Et statim:

— *Partitim singula quemque  
Nobilitant. —*

Cete-



Ceterum PHILIPPE,

— *qua sparguntur in omnes,  
Intemixta fluunt; & qua diuisa beatos  
Perficiunt, collecta tenes.*

quodque Traiano attribuit Victor, *tantus  
erat in te rerum maximarum modus, ut quasi  
temperamento virtutes omnes miscuisse videre-  
ris.* Extollant Annalium monumenta Lycur-  
gum, quod Lacedæmoniis leges & instituta sa-  
lubria prætulit: Iulij Cæsaris erga hostes in-  
dulgentiam deprædicent: Numam Pompei-  
lium Deorum & sacrorum veneratio poste-  
ris venerabilem reddat: æstimetur Octauiani  
Augusti munificentia; & Alexandrum Ma-  
gnum continentia, fortitudo, & liberalitas ve-  
rè magnum faciant: orphanorum cura Titum  
cuehat, & in subditos beneficentia: Traia-  
num, hac Oratione etiam laudatum, optima-  
rum virtutum concentus animique magni-  
tudo cælo æquent. PHILIPPE, omnium ima-  
gines in te lucent, nexuque quodam tibi vni  
insunt. Tu amplissimū imperium, quod vtro-  
que orbe extenditur, æquissimis legibus es  
moderatus; Pietate in Deum, & loca illius cul-

C

tui

tui dedicata, nulli secundus. Clementia & benignitas tua erga subditos, alienos, hostes, orbem vniuersum theatrum habent. Quantâ verò sollicitudine in pauperû curâ desudasti? quo adfectu in erigendis Religiosorum cœnobiiis, ijsq̃ue amplificandis, cumulandis, & bonorum Regiâ profusione firmandis, adlaborasti? Quæ omnia cùm rara sint in te, illud æquè ac magis memorabile, quòd potentiores adfectus, haud secùs quàm hortum inambulans papauerum summa capita Tarquinius, rationis falce demessuisti; tuiq̃ue ipsius Rex fueris, perinde ac subditorum. Hinc nihil in vitâ expectandum existimasti, nisi quod & cum laude, & cum honore, & cum dignitate coniunctum arbitrabare. *Regium est ita viuere*, inquit pro L. Syllâ Romanæ facundiæ parens, *ut non modò homini nemini, sed ne cupiditati quidem seruias: contemnere libidines; non auri, non argenti, non ceterarum rerum indigere: populi utilitati magis consulere, quàm voluntati: nemini cedere, multis obistere.* Eaq̃ue de causâ omnes neruos intendebat PHILIPPVS III. vt iis quibus præerat, imò etiam his quibus non præerat,

con-

consilio adesset, beneuolentiâ & opibus prodesset; neque sibi tantum ciues populisq; datos, sed se etiam ciuib; populisq; datum sentiret. *Moderatori Reipublica*, dicit rursus Cicero, *beata ciuium vita proposita sit, ut ea opibus ampla, copiis locuples, virtute instructa inueniatur.* Laudatur Hadriani Imperatoris vox, *Ita se Rempublicam gesturum, ut sciret rem populi, non suam esse. Princeps salutaris, ut eruditè dictū est à Plutarcho, vinum quoddam* In Moralibus.  
 & *verum simulacrum est Dei, qui simul & optimus est & potentissimus. cui bonitas hoc praestat, ut omnibus prodesse velit; potentia, ut quibus velit, possit.* Adhæc erat PHILIPPVS accessu facilis, alloquio blandus. omnes tamquam Principatus membra amplectebatur, omnibus se partiebat, etiam vilioribus: imitatus RVDOLPHVM illum, à quo gentis Austriacæ splendor primū illuxit; qui cū submoueri tenuiores ad se adfectantes per satellitium videret, cum stomacho exclamauit: *Per Deum! verba ipsius narro, sinite homines ad me venire. Neque enim ad Imperium me euocauit summus ille Imperator, ut arculā inclu-*  

C 2

dar.

*dar.* O Principem tantis liberis nepotibusque dignum!

Maximum verò ad potentiam comparandam stabilimentum est contracta cum potentioribus Regibus affinitas. Imò *præcipuum Principis munus*, monet Atticus Orator, *amicos parare*, ut quibus nullum firmitus Imperij instrumentum est. Huic socia est successio, & hereditas. Vtraque PHILIPPO Regi raro Dei munere obuènere. MARGARETAM enim AVSTRIACAM FERDINANDI II. *An. 1599.* Cæsaris feliciter regnantis sororem, matrimonio sibi iunxit, viginti & vnus annorum curriculum emensus. Ex hac liberos sex suscitauit, utroque sexu pares. Primogenitum sibi cognominem, PHILIPPVM DOMINICVM VICTOREM, quem eodem Baptisterio quo olim B. Dominicus, salutaribus vndis ablui, & eundem nominis cognatione exprimere voluit, LVDOVICI XIII. Regis Christianissimi *An. 1615.* præstantissimæ sorori; illi ipsi verò, ANNAM filiam natu maiorem connubio tradidit: eoque velut adamantino coagulo, potentissima Christiani orbis imperia connexuit, & amo-

amorem subditorum in soli & sanguinis Principes firmauit. Successio est quæ ius sartum tectumque in Imperiis seruat, bellisque intestinis materiem subtrahit, neque infidæ competitioni locum esse sinit.

Illud autem de PHILIPPO Rege nulla ætas conticescet, quâ solertiâ nuper superstites Maurorum reliquias totâ Hispaniâ abire iussit, & supra sexcenta millia in Africam, unde venerant olim, relegarit. Quam rem ut altius repetamus, nouem propè sæcula effluxerunt, quod quinque Saracenorum Reges, plures Maurorum myriades in Hispaniam per mare traduxerint, eo animo ut Regna illa suo subiicerent imperio, & Christiani nominis memoriam obliterarent. iamque Colimbriam, & alia loca violentâ manu expugnauerant, quando *Ferdinandus* Legionis Rex, *Rodericum de Binar*, cognomento *Cidum Campiatorem*, cum exercitu submisit, qui Deo duce, in cuius manu omnium sunt iura Regnorum, multitudine barbarorum hostium nihil territus, magnâ alacritate manus contulit; ac plurimis in captiuitatem abductis, aliis (quo-

Roderic.  
Sancius  
Hist. Hispan. l. 3.  
cap. 17.



Lipf. in  
Exempl.  
Politiciis.

rum numerum nemo facilè definiat ) cæsis, Regibus quoque ad angusta redactis , illustrem victoriam reportauit , Afrosque totâ Hispaniâ eiecit. Fecerat hoc ipsum quoque *Alfonsus*, quem *Aldefonsum* alij nuncupant, & post hunc *Carolus Magnus*, inclyti & sanguinis & nominis Principes. quorum exemplo, PHILIPPVS eam gentem id dudum agitantem, quâ ratione barbaris ceruicibus mitissimi Regis iugum excuteret, exciso intestino malo, finibus etiam suis proscripsit. Quis nunc sermone complectatur, quoties Occanum, qui ditionum eiusdem non minima pars, piraticis excursionibus magno negotiatorum incommodo infestatum, immisâ classe, absque vlllo prædonum occurfu peruium præstiterit? Testis mihi *Arx Larasche*, arte & naturâ loci munitissima, frustra à maioribus tentata aliquando, ante annos decem in potestatem suam redacta, imperioque adiecta. Quis pro merito eloquatur, quâ sedulitate, quo zelo, quantis opibus serpentem hæreticæ prauitatis pestem cohibuerit? eosque qui nouitiam Religionem irreligiôsè inuehunt, &

vnâ

An. 1610.

vnâ tenebrarum nocte excussa errorum dogmata in vulgus spargunt, quàm religiosâ seueritate represserit? Pietatem verò, quam <sup>1. Tim.</sup> magnum quæstum Doctor Gentium indigetat, <sup>6.</sup> tanto studio excoluit, vt nihil de auito Austriacæ gentis obsequio erga communem Deum, eiusque in terris Vicarium, & sacrorum Antistites vel administratos, remisisse videretur. quin potius maiorum præclarè factis exardescens, id effecit, vt nisi CATHOLICI REGIS nomen, iam à *Reccaredo*, qui suffragio Concilij Toletani illud primùm meruit; ac dein *Aldefonso* & *Ferdinando* Regibus donatum, sibi hereditarium accepisset, id ipse sibi posterisque huius famâ virtutis peperisset. Et sanè quis est qui inficietur, magnitudinem & triumphos huic stirpi, ab eâ ipsâ, Sacrorum inquam, veneratione & tutelâ, sceptris Regniſque propagatos? Religio prolapsa Rempublicam etiam trahit, & *colentibus Deos*, ea T. Li. <sup>Lib. 5.</sup> uij prudens censura est, *prospera eueniunt*. Audite quid in Lyricis suis Horatius:

*DI multa neglecti dedere  
Hesperia mala luctuosa.*

Dedê-

Dedêre, fateor: sed tunc, cùm impiæ religiones in eâ susceptæ, & superstitione indomitam regeret multitudinem. At postquam verâ Religione imbuti omnium animi, Regumque devotione permoti, Deo Divisque debita obsequia impenderunt,

*DI multa placati dedêre*

*Hesperia bona fructuosa.*

Denique nihil antiquius Rex PHILIPPVS habuit, quàm Pacis (maximum ea & diuinum bonum est) tuendæ studium. Quòd namque Belgica tot cladibus attrita, fessum bello latus annis XII. sustulerit, Martemque velut compedibus adstrinxerit, illius etiam benignitati nos debere fatendû est. O triumphum triumphis omnibus potiolem! Bellum tamen nunquam ita detrectavit, quin si quis eò insolentia procederet, vt iram indignationemque eius mereretur, quasuis vires illius potentia cedentes ilicò sentiebat. Et senserunt Byzantini tyranni Imperia non semel. Sensit nuper rebellis FERDINANDO II. quem pridem  
*An. 1618.* solemni inauguratione Regem salutauerat Bohemia, & eidem Cæsari ac Principi suo obfistens,



sistens, excitâ Protestantium & Caluiniani  
 stigmatis toto orbe candidatorum factioni-  
 bus Germaniâ, sic vt tota penè Europa in par-  
 tes traheretur; conferentibus illis certatim in  
 vnum vires suas, vt *Frederico* Rheni Palati-  
 no Regium Bohemiæ, & mox Cæsareum  
 diadema deferrent, quod per summum sce-  
 lus Imperatori & Regi FERDINANDO au-  
 ferre moliebantur. Verùm dum is, quod in  
 Solis filio notat Ouidius, regia soceri Regis  
 monita improuidè despicit, & ad ostensam  
 purpuram iuueniliter respicit, interuenit PHILIPPVS, subuenit PHILIPPVS, arma & æs  
 contulit PHILIPPVS. Cumque pro iustitiâ  
 bellum susciperetur, *cuius primum munus est*, Cic. lib. 1. de Offic.  
*vt ne cui quis noceat nisi laceßitus iniuriâ*; illius  
 exitus æquus causæ arbiter *Fredericum* desti-  
 tuit, bonis & patrio etiam solo exuit, FERDI-  
 NANDVM restituit, & ablato suoque rursus  
 diademate induit: ac nouitium & paucorum  
 dierum Regem, apud pessimos suos consulto-An. 1620.  
 res, absque Regno, solo adscitæ maiestatis no-  
 mine aliquamdiu (velut olim apud Bythinæ  
 tyrannum Hannibal) delitescere, & ignotis  
 D Bata-

Batauorum sedibus vagari, ceu nutritium aliquem, compulit. Ambitionis hæc rota est. & vt flammæ infinita vis acrior, quò ex luculentiore incendio emicuit: ita illa, in magnarum dignitatum congestu collocata. Igitur quod Sciano Iuuenalis, Regi etiam, si Dīs placet, *Frederico* iure dixerim:

Sic. 10.

— *qui nimios optabat honores,*

*Et nimias poscebat opes, numerosa parabat*

*Excelsa turris tabulata, unde altior esset*

*Casus, & impulsæ præceps immane ruina.*

Porro vt nihil in humanis rebus perenne, & velut orbis quidam orbi huic inest, celerique turbine mortalia versantur, PHILIPPVM III. in puppi Christianæ naus sedentem, altaque meditantem, ineunte nupero Martio (ô mens feralem, & crebris funeribus atratum!) morbus pertinaxprehendit, vltimæque necessitatis iura præscripsit. Quæ dum ille adesse sentiret, omni curâ id egit, vt cogitatione in cælum defixâ, terreni Regni fastigia deponeret. Expiatis igitur mediâ confessionis voce culpis, omni que vulnere, si quod animæ hærebat, *Ludonico D' Alyaga* spiritali suo Medico

dico ( cuius suprà meminimus ) detecto , crebrum de dissolutione sui corporis sermonem miscuit , & expeditum ad meliorem coronam iter præmuniri sibi repetitâ precatione flagitavit. Aderat nouissimis ipsius etiam *Hieronymus à Florentiâ* , quem è sublimi loco Dei verbum euangelizantem , magnâ alacritate per Quadragesimam audiuerat. ad hunc ducto altè suspirio non semel dixisse perhibetur: *O si viginti & duobus annis , quibus amplissima hac Imperia fui moderatus , Deo & mihi , ab hominibus elongatus , vixissem !* Hærebat trunco Crucis sibi oblatae , & in eâ fixi Redemptoris pedes osculo fouebat. lacrymarum imbre perfundebat , brachiis stringebat. Intulerant Sanctorum cum Deo regnantium reliquias viri religiosi , qui decertantem supremâ hac luctâ , & vocis pietatē , & precum suffragio excitabant : quas simulac intuitus , venerari protinus , palmas extendere , patrocinia illorum , quorum eæ superstites erant , apud Deum , ad quem mox erat iturus , pio desiderio postulare , ac incruenti etiam Sacrificij oblationem , suiq̃ue memoriam ad Domini altare adstanti-

bus reficere. Igitur pœnitentiâ purgatus, Viatico, quod consolationis Deus filiis suis in hoc ergastulo præstitit, roboratus, sacroque Oleo perunctus, primogenitum, quem sacrarum cærimoniarum inspectorem & testem adesse voluit, Regnorum potentissimæque Monarchiæ heredem instituit; ac benè illi precatus, suprema quædam mandata statim à suo funere exequenda, membranis concepta & obsignata reddidit, & cum his, Catholicæ Ecclesiæ, extra quam nulla est salus, tutamen, & ad omnia perutilem pietatem seriò commendauit: productaque Christi è cruce pendentis imagine, quam ab Imperatore *Carolo Philippus* pater, ab isto mnemosyni vice is acceperat, *Hoc*, inquebat, *patris, aui, atauique monumentum extremum cape: & mortalitatis memor, id unum incunctanter age, ut Dei timore confixus, matris Ecclesiæ haud degener filius inueniatur. exempla & monita maiorum habes. huc oculos mentemque aduerte. his si vitam instituis, hanc, & Imperium firmabis.*

Dixerat. Et ecce compositis iam omnibus, grassatus aliquamdiu per vniuersa corporis domi-

domicilia morbus, naturæ vires ita incessanter & pertinaciter oppugnauit, vt eas mox fatali necessitate vrgente expugnaret. Siquidem ille post crebras animi verè Christiani significationes, inter sacrorum ministros, & salutare acclamationes, ad quas & oculos morte grauatos, & aures erigere visus, extenuatum ægritudine corpusculum putredini natū (quod aromatibus condiri & exenterari cauerat, cū illud non nisi maximi peccatoris sarcinam diceret) terræ suæ, tumuloque parentum, in Escuriali; spiritum cælo, vnde venerat, & Deo qui creauit illum, beato fine reddidit; promissam fidelibus hereditatem, instructus meritorum quæ illius sunt semen, manipulis exacturus. Vos, vt facitis,

— *manibus date lilia plenis,*

AVDITORES, dum

— *Reliquia, diuiniq; ossa parentis*

*Condantur tumulo; —*

& deinceps nouam cæli imaginem, ignemque Deo vicinum, & in perpetuas æternitates coruscum, mente vsurpate. Interea, Rex PHILIPPE, manebit apud nos memoria tui, ma-

30 LAVDAT. FVNEBRIS D. PHIL. III.  
nebit honori tuo veneratio. Sed & nemo erit,  
cui improuisa mors tua, quâ recedentis æui  
incommoda præuenisti, immatura, ne dicam  
exitialis, rei Christianæ non æstimabitur; nisi  
& alterum PHILIPPVM iudicio tuo imperij  
heredem, exemplo Principem, voce successo-  
rem, singulari Dei beneficio nobis reliquisses.  
Hunc vt sub oculis tuis, quibus videntem  
omnia facie ad faciem vides, augustior currus  
excipiat, & se verum Christiani populi Recto-  
rem, ad quem velut ad beneficum sidus om-  
nes aduolent, exhibeat, omina & vota nostra  
pio adfectu conferimus. Tu patrocinium im-  
pende: & à nobis absens, in filio Principe, he-  
rede, successore, exemplo, famâ, virtute, lau-  
dandum, imitandum, & videndum te siste.

D I X I.

ANTVERPIÆ,  
EX OFFICINA PLANTINIANA  
BALTHASARIS MORETI.  
M. DC. XXI.





I V S T I R Y C Q V I I

G A N D E N S I S , P R E S B Y T E R I ,

C I V I S R O M A N I ,

P I E T A S ,

I N F V N E R E

P H I L I P P I I I I .

A V S T R I A C I ,


H I S P A N I A R . I N D I A R V M Q .

R E G I S P O T E N T I S S .



3

ILLVSTRISS. ET REVERENDISS.  
D O M I N O  
D. IACOBO BOONEN  
EPISCOPO GANDAVENSI,  
E T  
ARCHIEPISCOPO MECHLINIENSI  
DESIGNATO,  
PIETATEM HANC FVNEBREM  
DEDICO.

VI nuper querulus esse cœperam, ILLVSTRISSIME DOMINE, in funere PAVLI V. PONT. MAX. BVRGHESII, vix manum de tabulâ, sine (vt Poëtæ nostri loquuntur) de citharâ leuâram; cùm ecce, qui vniuersum terrarum orbem, aures quoque meas acerbissimus rumor impleuit, PHILIPPVM III. AVSTRIACVM, CATHOLICVM HISPANIAR. REGEM, fato concessisse. qui sanè nuntius turbauit me, vti debuit, plurimùm. Duobus enim summis Principibus, R. P. Christianæ velut Tutelari- bus, eodem tempore amissis, & tunc quidem, cùm ijs

A 2                      maxi-

maximè indigebamus, ad dolorem nostrum nihil addi posse videbatur. Vnde, si Crœsi Lydorum Regis filij, muti aliàs, vocem rupit periculosa barbari militis in parentem comminatio; nihil mirandum erit, si, dum Tu, VIR ILLVSTRISIME, in Vrbe Regiâ, REGIS DESIDERATISSIMI FVNVS honorasti; Christiani orbis orbitate commotus, in voces luctuosas, qui nuper silebam, eruperim. Eoque magis, quòd (vt in publicis miseriis fieri amat) nemo sit qui damnum hoc mecum non senferit; plurimi, doloris communis acerbitatem priuatâ facundiâ euulgarint: quorum immortales gemitus ad ipsam Posteritatis memoriam venturos non dubito. Mihi, vti in hac ingenij tenuitate arrogare nihil audeo, ita abundè satisfactum existimabo, si Te, ILLVSTRISIME DOMINE, testem, immò laudatorem, officiosæ PIETATIS habuerò. Sufficit enim mihi ad AMPLITVDINIS TVÆ fauorem decurrisse, quod aliorum fortassè nausea non probarit.

Ex agro Diœcesis Tuæ Gandauensis Wafiano,  
XVII. Kal. Quintil. CIO. IDC. XXI.

AMPLITVD. T. ILL<sup>MA</sup>

*obligatiss. cliens*

IUSTVS RYCQVIVS P. C. R.

I V S T I R Y C Q V I I  
 G A N D E N S I S , P R E S B Y T E R I ,  
 C I V I S R O M A N I ,  
 P I E T A S ,  
 I N F V N E R E  
 P H I L I P P I I I I .  
 A V S T R I A C I ,  
 H I S P A N I A R . I N D I A R V M Q .  
 R E G I S P O T E N T I S S .



E P I C E D I O N .



*Q*UAE tua, Regali Pictas circūdata busto  
 Ossa amplexa fouet lacrymans, tenui-  
 que fauilla  
 Imminet, & cineres arcanā colligit  
 urnā,  
 Rore leui superinfundens, & thurea dona  
 Accumulās, noménq; tuum, DOMINATOR IBERVM  
 A 3 MAXI-

MAXIME, saepe Vocans, quantis singultibus illa  
 Concutitur! quantum niveos expansa capillos,  
 Pullatâsque trahens ingrato syrmate Vestis,  
 Ardet funerea spectacula tristia pompa  
 Dispositis ornare Vires! quàm fronde cupressi  
 Compita, & innumeris ornare Palatia tadis!  
 Quàm tua Progenies (si sacula prisca tulissent,  
 MANIBVS crepti se deuotura PARENTIS)  
 Incluta Progenies, & viua Parentis imago,  
 Panchaas fruges, & odoris balsama lucis  
 Edita Niligenûm, tumulo sparsisse paterno,  
 Ascensosq; rogos Arabum perfundere melle,  
 Aut nimbis studeat Cilicum! quàm gnaviter omnis  
 Qua fuluo perfusa Tago, qua Batidos amne  
 Aurifero tellus, ditcis scrutetur arenas  
 Vt patrio sacri cineres tumultentur in auro!  
 Ipsa dehinc, roseos fusci qua Mennonis ortus  
 Spectat, & extinctos Nabathai Hyperionis igneis  
 India, gemmanteis mittat studiosa lapillos,  
 Ornamentum ingens cineri, Dominoq; sepulcro.  
 Scilicet hoc meruere tui REX MAGNE labores,  
 Conscijs atque animus recti, Virtutis & alta  
 Sectator, populisq; vigil tibi cura regendis:  
 Hoc ingens Veri studium, defensaq; Diuûm

Relli-

Relligio, & bene culta Themis, morésque pudici,  
 Atque inter castos generosa Modestia mores;  
 Tu tamē, heu! prohibes: tua nota, PHILIPPE, volūtas,  
 Iussūque, queis dulcibus supremo fœdere Natos  
 Stringebas, pia ne temerarent funera sumptus  
 Immodici; tantum populos pressere dolentes,  
 Quàm sanctus properabat amor. satis ipsa laborat  
 Relligio seruare fidem: legūmque potestas  
 Nutat, ut extremis constet reuerentia dictis  
 Principis, & trepidos angunt promissa penates.  
 Non equidem lacrymis modus est iustoque furori  
 Impositus; iuuat insanos haurire dolores,  
 Et mæstos ululare sonos: iuuat ire per omnes  
 Mæstitia causas, totosque impendere luctus:  
 Dignum est quod gemitur, nec inani munere currunt  
 Vndantes lacryma; dilectum Regna PARENTEM,  
 Non Dominum, non crudelem fleuere Tyrannum:  
 Qualem Delicias Orbis, Generisque Fauorem  
 Humani gemuere TITVM: quantūque per omnes  
 Luctus igit, pius ille tuus cum, Narnia, \* CÆSAR  
 Occidit: Hispanā vel qui prognatus in orā  
 TRAIANVS, Latij Artaxata subdidit armis.  
 Et grauis hinc poterat mærorum causa videri,  
 Euboica si fata senis, vel Principis annos

\* Coeca-  
 ius Ner-  
 va Imp.

Nelei-

*Neleida impleffes; media nunc flore iuuenta,  
 Flos Regum, demeffe iaces: iacet & tua tecum  
 Illuftris Probitas, & noftri crimine facli  
 Integritas maior, multos victura priores,  
 Aurea quos viuis fculperunt facula chartis.  
 Taliter umbrofa denfa inter robora filua  
 Si procera ftegit, nullâ temerata bipenni,  
 Sacra foui quercus, nodofa cortice nondum  
 Cinâta, nec annofos expandens vertice ramos;  
 Sed virides elata comas, & nubila pulfans  
 Cafarie, fi fortè Iouis malus ignis ab arce .  
 Difilijt, vel crudeles ftrinxere fcores  
 Agricola, trahit ingentem prostrata ruinam:  
 Hanc Dryades fleuere, hanc ruricola Siluani,  
 Delicias periffè fuas: quam floribus vdis  
 Sapius, appenfis aut diftinxere corollis.  
 Nec mihi tot claros Reges memorare voluntas  
 Auctores generis, Proauumque extendere facta;  
 Laudentur proauis, & auita munere cara,  
 Quos nullus Pietatis honor, non aurea Virtus  
 Commendant, propria quibus eft incumbere Fama  
 Subtractum à Superis. Tibi quamquam illuftris origo,  
 Sanguis & ipfe Ducum generoso à fanguine cretus  
 AVSTRIADVM, terris quo non illuftrior ullus;  
 Ex*



Ex te nomen eris. Poteras (si fata tulissent)  
 Principium esse domus, & magni stemmatis auctor  
 Nobilitate tuâ. Sapiens non atria iactat  
 Splendida imaginibus, nec ab ipso ducta Promethæo  
 Nomina, vel gemino quantum prorepfit ab ovo  
 Gente Terapnæâ Ledæi sanguinis; unum  
 Sollicitus, claris si fortè parentibus ortus,  
 Degenerem ne vita probet: vel cùm mala Parca  
 Nascenti invidit, generis dispendia factis  
 Vincere, & è solidâ laudem Virtute parare.  
 At quamquam tua paci radiaret oliuâ  
 Tuta domus, procul atque piâ Mars impius aulâ  
 Terreret gentes; nec te gaudentia castra  
 Vidissent pulcros ornatum castris crineis;  
 Si tamen impendens metus ad fera bella vocasset,  
 Ipse vel armiferas ardens scandisse carinas,  
 Fulmineosque igneis, saevique pericula Nerei  
 Spernere, & hostilibus ingenti cuspide terras  
 Concutere, aut rabidis poteras dux esse manipulis.  
 Sed meliore viâ placidam tibi fata quietem  
 Contulerant meritò, serâ dum nocte, diuque,  
 Numina placatis supplex aduolueris aris:  
 Dum tua votivis surgunt donaria Templis  
 Plurima, nataleis sen quâ Sol visitat arceis.

B

. Occi-

Occiduus, seu quàm reliquo suffunditur Orbi.  
 Inde gradu fluxere Tibi bona cuncta benigno,  
 Multaq; regnanti Superùm indulgentia fauit.  
 Vidit enim in fonteis animos, sanctosq; labores  
 Egregij iuuenis, mordacis & integra culpa  
 Pectora, & in medijs calo fidentia curis,  
 Vidit, constanti qui lumine corda pererrat.  
 Interiora Deus: sed magnos antè Monarchas  
 Inspicit, & tacitus regnorum examina librat.  
 Nec mirum: Videt ille facem surgentis Eoi,  
 Emoriensq; iubar: Borealis frigora terra  
 Lustrat, & egelido sudantia rura tepore:  
 Peruidet ille omne Mundi latus, ipsaq; Olympi  
 Nubila, & aquorei stagnantia dorsa profundi.  
 Ille & consilia, & mentem scrutatus, & aris  
 Supplicia acta pijs: ille intractabile pondus  
 Dilectis impostum humeris pictate ministrâ  
 Extenuans, magnâ curarum parte leuauit.  
 Hinc licet egressum terris haud sensit Iberis,  
 Asra tamen tremuit tellus, Ponti q; minacis  
 Regia, & armis omni gens horruit accola Rheni:  
 Hinc te victricis mittentem in praelia turmas  
 Alpinus trepidauit apex, populi q; potentis  
 Ausonia, & gelidam regio qua respicit Arcton:

Indo-

Indorumq; alio posita sub sidere terra  
 Gentibus innumeris, Romana potentia quondam  
 Quas rerum dominis nequijt coniungere sceptris  
 Oceano fusas immenso, auoq;e priori,  
 CÆSARIS auspicijs & Ibero Marte, reiectas.  
 Nimirum hoc fatis fuerat, Superumque perenni  
 Firmatum arbitrio, tantas ostendere gazas  
 Non prius, AVSTRIADVM terris fatale regendis  
 Quam genus, his opibus regnoq; ingente potitum,  
 Romanas Aquilas, Romanaque Sacra, potenti  
 Redderet auxilio, dirumque auerteret hostem.  
 Tu facis, Augusta non infima gloria Stirpis,  
 Vt passim Latios pandant Sacraria Ritus:  
 Romuleusque tuo latatus munere CÆSAR  
 Affinem Pietate probat: per te ipsa resurgunt  
 Imperij decora, patriumque repulsus ad Istrum  
 Barbarus, Ausonias didicit metuisse secureis:  
 Tu facis, ut Bataunum gens dura, trucesq; Sicambri,  
 Depositis belli exuvijs, odioque remoto,  
 Adsuescant iuga blanda pati: Tu, quisquis iniquus  
 Obstitit, obscure vel aperto Marte laceffens,  
 Parcere consuesti potius, factisque benignis  
 Vincere, quam fuso pœnam expetisse cruore.  
 Nil tamen, heu! raris Clementia cognita sceptris,

Nil Pietas, atque alma Fides, nil sancta iuare  
 Religio potuit, faustos quin dira penates  
 Stamina polluerent, trinaq; admorsa sorori  
 Licia tam pura violarent tempora Vita.  
 Ergone semper erit, mortalibus optima quaque  
 Ut rapiat suprema dies? ut livida fata  
 Irrumpant quacumque magis potuisse nocere  
 Crediderint? raptâ non pridem coniuge feras,  
 Tristis ut Eurydicen solas ad Strymonis undas  
 Odrysius fleuit vates: & coniuge tali  
 Quid Divi valuerit magis tribuisse pudicum,  
 Quid formâ par atque fide? tamen hanc quoq; Parca  
 Sustulerat. nec visa satis tribuisse furori,  
 Aut scelerum complexse minas; inuat altera tela  
 Stringere, & orbatî consortia perdere lecti.  
 Nî magis hoc Patri Divûm, sanctisq; peractum  
 Calicôn, ut quâ cali super ardua Templa,  
 Inclyta progenies Divûm REGINA, triumphans  
 Ingreditur, pedibûsque terit mortalia fata;  
 Reddavis REX MAGNE TUA: castosq; Hymenaios  
 Purpureos inter repetas lucentior igneis.  
 Illic te roseis amplexum blanda labellis  
 Excipiet: iamque aut cali laquearibus aureis,  
 Fulgida quâ puro collucent lumina Mundo,

Aut

*Aut fortunatos spatiatum ducet in hortos  
 Elysij nemoris, sedes tibi longa priorum  
 Spectatur generosa Ducum, cognatâque Regum  
 Agmina, & emerita capiunt Virtutis honorem.  
 At quacumque poli latus regione tugaris,  
 Sis felix sospesque tuis, sis fidus amicum  
 Gentibus, & nostri relesnes contagia sacli.  
 Sit gratum tibi Vatis opus, sint carmina grata  
 Flebilis obsequij: Musâq; inuicta suprema  
 Munera, & Aonium non dedignare sepulchrum.*

# REGIS CATHOLICI

## POSTREMA VERBA

A D

## FILIVM HEREDEM.

**S**UPREMA Vita contrahens suspiria,  
 Oculosque morte praeuatos sentiens  
 Princeps Iberum, sic PHILIPPO filio  
 Fertur locutus: Nate, Patris gloria,  
 Decusque summum, sic tua prudens reges  
 Vita tenorem, morte si doctus meâ  
 Humana cuncta Vitream bullam putes,  
 Fumumque inanem, somnium, atque fabulam.

B 3

Illud-

Illudque summum Regio scepro datum  
 Ius esse credas, quidquid horâ in ultimâ  
 Malis peractum. Dulcis est sceptri decor,  
 Dulcisque regni purpura; infelix tamen  
 Suum tenere stulta qua nescit modum,  
 Et frana blanda laxat impotentia,  
 Legis suprema, & sortis humana, immemor.  
 Cum pœnitendo mens onusta crimine  
 Regis Tyranni, qua paucere noluit,  
 Vita sub ipso iam tremiscit exitu:  
 Heu saepe serò, saepe iam frustra gemens,  
 Suaq; tandem infirmitatis conscia.  
 Ille ergo Regnis lenis ut parens suis  
 Præesse discet, qui sibi ipse regula  
 Modestia imperarit ac Clementia:  
 Reges in ipsos imperare calitus  
 Credens Tonantem, fas nefasque qui videt,  
 Feretque digna conscriptorum pramia.  
 Hunc tu verere: Patriaq; gloria  
 Heres fidelis, hanc tibi summam putes  
 Iniuriarum, quin & hanc unam putes,  
 Illata si qua factione ab impiâ  
 Sacris auitis Numinique contigit:  
 Hanc persequare vindice usque dexterâ,

*Hanc*

*Hanc ferro & igni, cum necesse, excidito.  
 Sic semper aquam calitis fauentiam  
 Habebis aula: sic tuus numquam preces  
 Aversus aure spernet irata Deus:  
 Scepтрisque vindex aderit, & tutor, pijs.*

ALIA EIVSDEM REGIS VERBA  
 AD IMAGINEM  
 SERVATORIS CRUCIFIXI.

**H**ANC vitam, hanc animam, hos moribundi  
 corporis artus  
 Aeternum obsequiis offero, CHRISTE, tuis:  
 Hoc sceptrum, hoc misera Regale insigne tiara  
 Sacra tibi, Regum maxime Rector, habe:  
 Scilicet hoc cunctos super est vixisse beatos,  
 Cum Domino placide commoriente mori;  
 Scilicet hoc cunctos super est regnare potentes,  
 Imperium ad dios deposuisse pedes.

EIVSDEM MODESTIA  
 BALSAMO CONDITI CORPVS  
 VETANTIS.

**Q**UOD tua Achamenio conditi corpora costo,  
 Tincta vel Assyrio rore sepulcra vetas,  
 B 4                      Magne

*Magne PHILIPPE, istâ nihil est ratione negatum  
 Funeri; & officiis nil perit inde tuis:  
 Nam quæ Virtutum fragrantia summa tuarum est,  
 Balsama, & Assyrii vincit honoris opes.*

EPITAPHIUM.

**Q**VI cunctos gæzâ superavit diuite Reges,  
 Cui nemo insigni par Pietate fuit:  
 Decolor extremis cui paruit India terris,  
 Qui nutu implevit Solis utramq; domum:  
 AVSTRIADVM flos, & Regnantum gemma,  
 PHILIPPVS,  
 Marmore in exiguo pulvis & Umbra iacet.

DIVITIÆ SALVTIS SAPIENTIA.

Imprimi poterit.

*P. Coens Canonicus Antuerp.*



ANTVERPIÆ,  
EX OFFICINA PLANTINIANA  
BALTHASARIS MORETI.  
M. DC. XXI.





